

U ZENICI U ČETVRTAK

Svečano otvorenje Centra za djecu s posebnim potrebama

Za četvrtak, 24. septembra, u 11 sati, zakazana je svečanost otvaranja Centra za rano podsticanje razvoja i ranu intervenciju za djecu sa posebnim potrebama u Zenici, koji se nalazi u Ulici Cakana Mulalića na broju 5, odmah iza zgrade Centra za socijalni rad. Projekat je realiziran kroz saradnju Udruženja Humanost – societas humanitatis iz Zenice i humanitarnih organizacija Terra Tech i Lebenshilfe Plauen gGmbH iz SR Njemačke u periodu novembar 2008. – septembar 2009. godine. Centar je namijenjen djeci sa posebnim potrebama predškolskog uzrasta sa područja svih dvanaest općina Zeničko-dobojskog kantona. U njemu će se na najpotpuniji način zbrinjavati djeca ometena u razvoju ili u riziku od nastajanja



Završni radovi na Centru i njegovoj okolini biće gotovi do četvrtka

ometenosti u razvoju, bilo u tjelesnom, kognitivnom, govornom, emocionalnom ili socijalnom smislu, ugrožena ili usporena na uzrastu od rođenja do polaska u školu, kao i njihovim roditeljima, drugim zakonskim starateljima i osobama koje vrše odgojnu funkciju sa područja općina našeg kantona. Prve dvije godine rada ovog centra bit će zajednički projekat Vlade ZE-DO kantona, svih općina kantona i udruženja Humanost, a finansije će obezbijediti Kantonalna vlada, općine i strani donatori. Inače, gradnja Centra za

rano podsticanje razvoja i ranu intervenciju za djecu sa posebnim potrebama u zenici je finansiran udruživanjem sredstava Ministarstva za ekonomsku saradnju i razvoj SR Njemačke, Vlade Kantona i Općine Zenica. Svečanosti otvorenja će, pored predstavnika lokalnih vlasti, prisustvovati i Joachim Schmidt, ambasador SR Njemačke u BiH, predstavnici njemačkih partnera na projektu, centara za socijalni rad, domova zdravlja, udruženja za pomoć osobama sa posebnim potrebama, vrtića ... I.H.H.